

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA MATUTUA FAAPITOA



AUKUSO - TESEMA

2023

AUKUSO 06,
2023

MATAUPU 1: "O LE ATUA E MAFAIA MEA UMA," (The God who will).

TUSI FAITAU: Kenese 3: 1 - 15.

SINI: Ia iloa e le fanau le tasi o natura faaalila o le Atua, na te mafaia mea lelei uma lava o lenei olaga.

Fesoasoani mo faiaoga: E faatalofa atu i faiaoga o le vasega Matutua Faapitoa i lenei fo'i tausaga faa-le a'oa'oga. Ua motu atu so outou matūpalapala e ala i le folasaga a le 'Faatonu', o lenā fo'i se lagona mo lenei tausaga aoga, ina ia tatou galulue faatasi ae a se lumana'i manuia o alo ma fanau a le ekalesia. O nai faamanatu masani lava; ae a le alualu i luma ma le malamalama o le vasega, aemaise ina ia faigofie ona iloa e le fanau o mataupu ta'itasi. O ta'iala mo tusitusiga o lenei tausaga aoga, ua na o 'manatu autū' mai le Tusi Faitau Aso i le gagana Peretania.

Ia taumafai e faamatala le lesona i au lava upu mai le tala o loo i totonu o le mataupu. O tauloto ma pese o loo tuuina atu e fesoasoani i manatu o le matuupu. Ia tautuana e faasoa lelei le taimi mo isi faiaoga aemaise galuega faatino i totonu o mataupu ta'itasi. E taua tele le faamalamalama o fanau i uiga o upu o i le tusi faitau o le mataupu, e mafai foi ona fai sau tala mai lou iloa masani e faatatau i lesona ta'itasi. O le mea lelei tele le faia o 'Iuni' i Pulega po o Ekalesia taitasi foi, e faamautū ai le mataupu, galuega faatino aemaise le vaevaeina o lesona i faiaoga e avanoa mo vasega ta'itasi.

Fesoasoani mo le Mataupu: Ae le'i la'aloa se faamatalaga i le tala o lenei mataupu, e muamua ona tatou manatunatu i le 'mataupu' o lenei taeao ma lona uiga. E malamalama gofie ona o loo faasino i manatu po le tasi o natura o le Atua. Peita'i, e leai lava o so i tatou na te silafia le mea o taoto ai lona finagalo paia. E tele ina iloa mulimuli ane, mai se faaaliga po o se i'uga foi o se faamoemoega na feagai ma le tagata. O le tasi o ala e iloa ai le natura o le Atua, pe afai e mafana ma vavalalata le mafutaga ma le Alii i taimi uma ma ia mamā le loto. O lea foi le manulauti o le mataupu, ina ia ola ma silafia o le Atua e mafaia soo se mea o lenei olaga.

O le tala masani o loo aumaia e le mataupu o lenei taeao; i le agasala muamua a le tagata pei ona molimau le Kenese. O le mafutaga a le ulugalii ma le Atua i le faatoaga. O le tau amata o le ulua'i aiga na ainā ai Etena pei ona i ai le ulugālii o Atamu ma Eva i le Kenese. O le soifuaga e i ai ona tu'utuuga ma aiaiga faatatau i le ola lelei o le tagata i aso fai soo. Ma o le tagata e ola ma soifua sa'oloto i 'aao mafanafana o le Atua, le mata'isau paia na saunia ai mea uma mo le lelei o le ola. Peita'i, na tuuina i ai ma le '**finagalo**' o le Atua e ao ona tausia ma usitaia. O le anava soifua lenā e faatonutonu folau i le ulugalii muamua o le faatoaga, ina ia ola ma anaana i tulafono ma aiaiga a le Atua i aso ta'itasi. O le olaga e tumu i mea lelei ua saunia mo le tagata; ae lē tuufaua le ola pe pule le foafoaga i ana mea e fai.

O tala ua lauvivilu ai le Aoga Aso Sa a le EFKAS, ae fou . O le isi mea o loo taumafai le tusi a Kenese e tau faailo mo le tagata soifua, o le 'mata'utia, silisiliese, mamalu ma le paia o le Atua o loo tatou talitonu ma tapua'i i ai. O le manatu e leai se mea e faigatā ia te Ia, auā o Le na **faatupuina** le ola, o loo Ia **faatumauina** le ola, ma o le Atua foi ua na **faaauuina** le soifua ma lo tatou ola e o'o i le faavavau. E lē mamā i le Atua lona finagalo faataotooto mo le tagata i aso fai soo, auā o le palealii o ana galuega mamana na faia i lona '**Faatusa Paia**'.

O le manatu e ao ona tuufaatasi se malamalama i le tusi faitau ma le iloa i natura faaalila o le Atua Soifua. Ma, aua ne'i galo o le Atua o le Agaga lava Ia, e lē mafai ona tutusa o tatou manatu ma ala o le Atua pei o upu a le Tusi. O loo ta'ua natura o le Atua pei ona tatou iloa; o le Atua e '**Silafia**' mea uma, e '**i ai**' i mea uma ma o Le ou le '**Malosi**' ma le mana uma lava. Pau la tatou pito laau, 'ia talitonu, faatuatua ma maua le salamō moni i lona 'Maliu ma lona Toe Tu mai le oti ma le tuugamau. E ui lava fo'i e faaalila lona to'asā pe a sese ma agasala o tatou tagata, ae tele ma taumasuasua pea lona alofa mo i tatou e lē aunoa. Ioe, o se fiafiaga sili ma le tāua 'o le nofo malamalama i mea e faia e le Atua, e aumaia le mautinoa aemaise le faamalosi au i taimi o faafitauli ma faigatā e fetai'i ma le tagata valaauina.

O nai lagona faatupu manatu, ona ua loa ma ua lava le silafia i le tala o lenei taeao. Peita'i, e maua pea se lagona mautū o le tagata talitonu pe a toe to manatu i faasalaga o le ulugali'i ma le gata pei ona silafia le



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org

